

ՀՀ ՍՅՈՒՆԻՔԻ ՄԱՐԶՊԵՏԻ ՏԵՂԱԿԱԼ ՎԱՐԴԱՆ ԴԱՎԹՅԱՆՆ ԱՅՑԵԼԵԼ ԷՐ ՄԵՂՐՈՒ ՏԱՐԱԾԱՇՐՋԱՆ

ՀՀ Սյունիքի մարզպետի տեղակալ Վարդան Դավթյանը փետրվարի 18-ին աշխատանքային այցով եղավ Մեղրու տարածաշրջանի Շվանիձոր, Ալվանք, Լեհվազ, Վարդանիձոր համայնքներում: Շվանիձորում մարզպետի տեղակալը հանդիպել է համայնքի ղեկավարին, քննարկել համայնքի սոցիալ-տնտեսական իրավիճակի հետ կապված հարցեր, ծանոթացել առկա խնդիրներին: Վ. Դավթյանը հետաքրքրվել է <<Գյուղատնտեսության զարգացման միջազգային հիմնադրամի>> (IFAD) հետ իրականացվող ծրագրի ընթացքին: Շվանիձորի միջնակարգ դպրոցում մարզպետի տեղակալը, ՀՀ Սյունիքի մարզպետարանի աշխատակազմի կրթության, մշակույթի և սպորտի վարչության պետ Հ. Ալեքսանյանի հետ մասնակցել է մանկավարժական խորհրդի նիստին, քննարկել դպրոցում առաջնահերթ լուծում պահանջող խնդիրները: Վ. Դավթյանը հետաքրքրվեց կրթօջախում տաք սննդի կազմակերպման աշխատանքների ընթացքից, այնուհետև եղավ համայնքի դաշտավայրերում, ծանոթացել գյուղատնտեսական նախապատրաստական աշխատանքներին:

Ալվանքում համայնքի ղեկավարի հետ քննարկման ընթացքում հանձնարարվեց կարճ ժամանակահատվածում վերացնել մի շարք կառույցներում առկա թերությունները: Քննարկվել են նաև Ալվանքի միջնակարգ դպրոցի շենքի անմխիթար վիճակի ու դրա բարելավման հետ կապված հարցեր: Դպրոցում Վ. Դավթյանը մանկավարժներին հորդորեց աշակերտներին ներգրավել տարատեսակ միջոցառումներում, առաջարկ եղավ աշակերտների դաստիարակության ու մտածելակերպի զարգացման նպատակով ուշադրություն դարձնել դպրոցում առկա ուսուցողական նյութերին: Այստեղ մարզպետի տեղակալը ներկա գտնվեց նաև դպրոցի տնօրենի թափուր պաշտոնի համար անցկացվող մրցույթին:

Լեհվազում Վ. Դավթյանը եղավ գյուղի նախակրթարանում, դպրոցում, ուր ծանոթացավ պայմաններներին, համայնքում առկա խնդիրներին:

Վարդանիձոր համայնքի բնակիչների հետ հանդիպման ժամանակ բարձրացվեց գյուղում նախակրթարան ունենալու անհրաժեշտության հարցը. (համայնքում կա 0-6 տարեկան 36 երեխա): Վ. Դավթյանը նշեց, որ խնդիրը ուշադրության կենտրոնում է, և այն լուծելու ուղղությամբ որոշակի քայլեր են կատարվում: Քննարկվել է նաև Վարդանիձորի դպրոցին մարզագույք տրամադրելու հարցը:

Աշխատանքային այցի ընթացքում մարզպետի տեղակալը համայնքի ղեկավարներին հորդորեց ուշադրություն դարձնել սեփական եկամուտների հավաքագրման գործընթացին, որպեսզի տարվա վերջում պարտքեր չգոյանան:

Առաջարկություն եղավ յուրաքանչյուր համայնքից սոցիալապես անապահով 5-4 ընտանիքների աջակցություն ցուցաբերել: Վ. Դավթյանի ուշադրության կենտրոնում էին նաև համայնքների էլեկտրոնային կայք էջերը: Նա պատասխանատուներին հորդորեց պարբերաբար թարմացնել կայքերը, որպեսզի իրենց համայնքներում իրականացվող միջոցառումների ու ծրագրերի մասին տեղեկացված լինի նաև հանրությունը:







